

讀白華草堂詩初集

讀白華草堂詩初集卷三 丁丑

鎮平 黃釗 穀生

寓樓晴望

晃眼看朝霽樓牕四面開  
荒田鴉啄雪古道馬馱煤  
作客亦云久寄書殊未來  
西山還笑我負却故鄉梅

晚過長椿寺

門前咫尺卽招提飯後時常一  
過之僧有俗情談熟宦  
客懷古意讀殘碑空堂  
服翼飛如鼠老樹垂髯  
立似羆誰與衆生來說  
法草蟲微咽舊臺基

重過長椿寺瞻菩薩聖像

余前日瞻菩薩聖像乃蔣心餘先生重裝因取  
忠雅堂集覽之其詩似專指孝定李太后隨作  
長句一篇後閱周在浚燕舟客話載長椿寺大  
殿旁小室內藏佛像十餘軸中二軸黃綾裝裱  
與他軸異展視之一繪九朵青蓮花捧一牌題  
曰九蓮菩薩之位明神宗母李太后也一繪女  
像其天人姿戴毘盧帽衣紅錦袈裟題菩薩號  
下注崇禎庚辰年恭繪烈皇生母孝純劉太后  
也余前日所瞻殆非九蓮實孝純也因重過長  
椿寺詢寺僧則云僅此一軸又疑軸內無下注

崇禎庚辰年恭繪字樣恐皆贗手重繪而寺僧  
更換十餘代更不知菩薩爲誰何矣

菩薩聖像存不存藏園所得疑傳聞黃綾裝裱有二軸  
燕舟客話徵遺文青蓮九朶乃孝定其一裝束真天人  
紅錦袈裟菩薩號戴毘盧帽莊嚴身烈皇生母諡孝純  
崇禎年繪當庚辰昨來瞻像髣髴是但無注記難討論  
此像縱在應非真當時法駕迎午門六宮皆泣帝雨泣  
畫工指示空摹神老宮婢視尙難審何年寶相開金輪  
神州爾時已陸沈三輔劫火飛沙塵至尊輟食后如泣  
菩薩淚眼同酸辛爲我語帝母過苦夢中此外何所云

佛力慈悲難殺賊坐令社屋荒荆榛蓮花座前象力困  
海棠樹下龍髯攀王母功德亦何有謂孝定寺中香火幾  
同湮滄桑兵燹二百載重來訪古知無因文人尙稱李  
后像比邱但誇菩薩尊殘縑半斷金粉脫麝手重繪空  
續繡梨花寂寂寺門閉西山却憶娘娘墳

二月初二夜夢敬之先生志痛

生別我難畱死別子誰送嗚呼我於子不及撫棺慟得  
書腸已裂蒼書腹更痛我胡不少畱少畱亦何用子年  
望五十德器本端重飲食亦善調札瘥詎能中我爲萬  
里行子身寡親從行亦卽歸耳正好朝夕共胡天不慙

遺折我屋之棟早麥雖及收晚稻且未種頗聞易簣時  
室內仍屢空我畱固無益或可視含贈此緣何太慳此  
恨向誰控九天虎豹關九地鬼幽洞顏色不可親魂魄  
來入夢

我家大河曲舊有長隄恃楊柳垂穆穆千百鹽船艤往  
年逢水災隄決至壩尾築復需萬金此費誰經始維時

善籌災趙公賢刺史

趙名康同官人

問隄決之由乃責舟人子

輸費築復隄著令勿停止近來狙詐徒損人以肥己利  
或致鯨吞舟竟同鱣徙子也訴長官經歲始得理羣狙  
最叵信歸鼠復多技竊恐吾子歿此輩復橫矣昨夜來

夢中顏色似歡喜我因急叩之子云無慮此我心亦覺  
安不謂乃夢耳覺來天未明鄰鷄啼不已安得吾子生  
金隄衛桑梓

桃花

一片紅英落墓門神仙符咒總空論花溪枉記湔裙影  
苔井難尋步屨痕酒渴清明誰破笑粥香寒食黯銷魂  
瑤池一去無消息青鳥飛來不肯言

舊傍青谿竹外居相逢記是燕來初圖中艷雪思名馬  
江上濃波趁鰕魚倩汝低鬟歌舊曲昵人臨水讀家書  
如何爛漫開無主照影空憐碧鏡虛

天寧寺塏歌

般若寺中紫光起普六茹堅作天子一囊舍利何方來  
九州學校同時毀幽州古塏雄岩堊二十七丈高復高  
傳聞石函乍安置碣石山根恒動搖開山龍象鞭神力  
獅座居然鎮鼇極想當工匠執役時邪許聲中苦長日  
開皇締造幾太平身崇儉嗇寬徭征如何天性不悅學  
獨信釋氏裁儒生佛書識緯增誣飾鬼仙禽獸俱荒忽  
高僧傳裏續奇聞三十三枚剃刀出塔鈴萬個搖丁當  
大野風沙折白楊迷樓螢火彌山谷不放阿儼舍利光

小病偶占一首



空齋小病著吟身隔斷通衢十丈塵靜對藥香如益友  
飽看書卷當佳人雞蟲得失何須較針芥機緣自有因  
多感良朋垂砭意不教無益費精神

余以耽吟屢  
爲魯與所規

三月十六日李十一職方

涵

生辰賦長句簡之

男兒三十未卿相起舞中宵聽雞唱男兒三十尙饑驅  
可憐局促真轅駒君年長我四百日舊紙同鑽未得出  
我今爲養亦爲貧君已讀書兼讀律初生乳虎氣食牛  
廿年磨折氣轉適人生不朽自有在艸頭朝露非所求  
君不見石崇王愷豪奴耳李志曹蜍何足齒立身須占  
千百年合眼可無萬餘子長安三月桃李開朝

天山

壁聲如雷兵曹乞假得閒放慕古直上黃金臺當時燕  
昭安在哉春雲碣石空徘徊我方搔首思龍媒千金上  
壽不可得誰當醉子葡萄酒

都中自春至夏不雨而旱風間作

塵沙眯眼障晴空孤負春遊控玉驄燕地花如貧女瘦  
幽州風是大王雄耕桑本自關民計旱嘆頻聞厯帝  
衷爲語萍翳須起雨秋成佇望奏年豐

梨園伎

燈月末上華筵開飛車駿馬梨園來梨園子弟顏如玉  
藏在車箱當金屋翩翩同上酒家樓喚作相公教度曲

一曲未終已絕倒狎客滿筵都叫好起來勸酒太匆匆  
耳畔低聲賣天姣纏頭到手向何處脫去翩然似狡兔  
酣呼嗽飲正紛紛擲牝黃金還不悟酒闌燈炧起身歸  
雪花如席滿街飛街頭恰遇搖鈴卒黎面冰鬚凍折骨  
一錢肯作天魔舞笑問官人可值得

方丈僧

參天松檜開精藍鐘魚方丈同朝參蒲團執拂大模樣  
趺坐合掌稱和南借問上人舊鄉貫當今大老論親串  
親王隔月來進香中堂前日曾畱飯扇頭書畫壁間詩  
名士詞林盡故知生平眼界非凡大蘇州杭州皆走過

京中此輩絕風騷想見禪門學問高君不見西方之書  
無不讀一部搢紳還爛熟

望雨戲作

乖龍如穉童頑懶不悅學雷公似蒙師威怒震磅礴鞭  
之始欠伸泠泠聲間作書非有意讀終覺氣微弱雷收  
雨亦歇四顧空虛霽負郭百萬田微潤久焦涸農氓望  
眼穿不殖勢將落汝龍何太慵嶄然負頭角吾當訴雷  
公努力加敲撲不然割龍耳猶勝抱佛脚

健兒行

大雪壓兜鍪軍門夜唱籌健兒呼不醒醉枕血骷髏

俠客行

無地洩恩讐相逢已白頭滿腔盛熱血贈子覺吳鉤

亢旱行

土焦石爛麒麟死赤地騰煙灼千里雷公無力召飛符  
驕龍竟抗玉皇旨祝融煽威旱魃喜牽牛飲牛見河底  
枯魚泣珠光索索低田無麥困無米雪山鸚鵡待開言  
淨瓶滿貯楊枝水

題汪少海

仲洋

出棧圖

讀君出棧集造化忌雕剜豈謂詩中險仍從畫裏看鴻  
荒開手筆奇境拓心肝勒馬重回首雲濤噴百盤

雜詩

觀人在小節所見毋乃拘豈知心術分衡鑒良不誣劇  
圃得遺金拾之何遽汚想當側睨時隱然一貪夫春秋  
首誅意不聞有非辜爲利令智昏何事不敢圖賢哉管  
遼東早拒華子魚

我有秦時鏡照見人心肝懸之素壁間中夜膽忽寒咫尺見魑魅醜態何嬖姍皎然月千里隱現煙一團邪正不並立疾惡胡能寬因彼離齷形使我廢寢餐旁有慧眼人授我藥一丸謂我太察察速禍恐無端毀鏡伸作刀閉眼勿復看

向聞葉子高所好非真龍當時已嘲笑賞識皆凡庸燕  
昭市駿骨豈復能追風何以華陽館名士如景從良由  
意肫摯非借術牢籠丈夫抱奇節吐氣如長虹一朝遇  
知己熱血填心胸卑哉孟嘗君狗盜儕英雄

立秋日登見山樓因憶去秋亦樵西樵小巖小鐵  
質守共聯詩課忽已一載亦樵於去冬病逝西  
樵小巖小鐵皆已出都惟余與質守昕夕相對  
歎逝傷離卒成一律

此日足可惜哀蠟催上樓停雲官舍渺

西樵在遷安小巖在真州小鐵

在真州

斜日殘宮秋

亦樵寄居長椿寺

與子共懷抱何人重唱酬

傷離更傷逝相對不勝愁

余近頗懷秋善愁魯興以詩相勸作此奉答

今古茫茫盡一杯短歌無故掇憂來吾儕豪氣何曾減  
天地秋聲自可哀豈憤龍愁聞鼓角雲黃沙暗沒蒿萊  
安仁別有無窮感不爲星星兩鬢催

疊前韻奉酬蔡師山

奎王

兄和之作卽以奉贈

吾愛蔡夫子耽書嬾下樓心空僧入定貌古樹當秋酒  
每連筒飲詩能任筆酬蛩吟應見笑何事只言愁

藤花館卽事用魯興見示原韻

忘形交許任天真難得緇塵寄此身曼倩有書容罵鬼



詞上卷 小言  
令升無事好搜神魯興近讀太平廣記客中綺思花撩眼天外狂  
談酒入脣不道西園賓從減館餐畱住倦遊人

秋日漫興

黃色上牆蒿驚秋首自搔風聲圍樹急雲勢簇山高舊  
事思紈扇新寒感布袍羈懷真嬾散空負廣陵濤  
作客非王粲登樓漫愴神丹楓醺酒客白塢禮詩人此  
境不寒瘦吾生寧賤貧門生來問字爛醉及花辰

棄婦詞

結髮爲夫婦恩愛同生死在鳥爲比翼在樹爲連理妾  
心千轉絲將郎裹在裏郎疑妾心妬棄妾將不齒郎心

本愛妾偶爲新人牽妾心專爲郎中道遭棄捐河魚煎  
作膠投之濁水中妾心不自明羞見姑與翁

解我耳邊珠脫我身上襦不能見郎面含淚別小姑小  
姑苦挽畱謂待郎意轉郎今實憎妾竟日廢餐飯妾雖  
願事郎但恐刺郎眼妾心如白水此盟可不寒郎對小  
姑言水亦有波瀾波瀾愁反覆無言淚相續覆水不可  
收棄婦不可畱願郎保青春妾自吟白頭

始皇

詩書燔盡燭餘威一炬咸陽烈焰隨到底天心仍未厭  
燒棺還遣牧羊兒

宣武門外道場祭幽歌

九衢無塵市聲靜千盞蓮燈關鬼境生人圍看如堵牆  
往日法場今道場高臺施食列饅首昨已無頭今有口  
高僧誦誦誦有詞幡竿歎動陰風吹萬眾無聲鬼屏息  
苦月淒涼漸昏黑忽聞攘臂聲大譁塵羹土飯喫泥沙  
是人非人皆菜色餓鬼叢中攫鬼食強鬼手強得飽餐  
散去攪作旋風團弱鬼手弱一無得倚牆傍壁空飲泣  
高僧眼閉不復開爾曹饑餓何有哉不見廠中官散粥  
吏豪醉飽饑民哭

北郭

北郭田多曠西山嶺自連斷虹攔暮雨一鶴破秋煙金  
碧自然畫水雲無盡天紅塵高十丈愛此地幽偏

古意

雨歇蓮葉蠹雨來蓮葉沈與郎似蓮子剖開纔見心  
寧作九孔針不作雙尾翦針還引線穿翦竟鉸絲斷  
不愛茶蘼霜不愛芙蓉粉一盆種合歡一盆樹蠲忿

送妹婿鍾望子歸博羅

四百峯頭一雁歸七千里外尺魚違送君行日舟車穩  
歎我年時去住非京國緇塵勞贈策高堂白髮念縫衣  
相煩代作平安語別後依然舊帶圍

到日歸帆過廣州牂牁秋畫入扁舟紅霞收雨拖魚尾  
白浪如山下虎頭回首片雲畱碣石相思圓月定羅浮  
風塵煙水都無暇一樣情懷兩地愁

小園

蛛網當門結踈籬一徑斜秋蟲欺病葉孤客呢寒花物  
態原相倚吾生未有涯夕陽偏戀戀回照入牕紗

天末

山氣忽然合碧雲招不來秋心在高樹古色冷金臺歸  
鳥吾真羨鳴笳爾亦哀無窮天末思豈待暮鐘催

羈愁

薄暮林鴉作隊還霜楓明處夕陽殷無窮弔古傷今思  
不盡荒煙蔓艸間僧舍招魂棲白骨女牆窺影立青山  
百端併作羈愁集怕見蛾眉月一彎

亦樵旅櫬南歸同魯輿至長椿寺殯宮詩以祝之  
蛟龍最無情魂魄況久弱君今隨風飄來去應非昨江  
流阻且深狎浪鯨魚惡從前謫仙人好險偶失脚君魂  
須善藏吾夢亦免噩莫唱鮑家詩恐致風濤作

荒村有白楊古墓多於屋

荒村古墓多於屋亦樵集中句

昔君行吟地

鬼火聚山麓今君旅櫬歸牛眠何處卜生前擾擾塵補  
瘡空挖肉逝水痛華年酸風號宰木春郊胡蝶飛秋塚

狐狸宿魂兮莫出山多恐歧路哭

贈王魯之

懷曾

緱山王子晉聞說是前身一見欣携手清談迴絕塵道  
心翦花葉仙夢切星辰莫向旁門悟蓬萊正好春

卽景寫懷

顛雷逐殘日雨脚如懸絲天光仰而看黃海鋪玻璃崩  
濤倏洶涌疾颺捲茅茨窗櫺盡搖動籤架齊翻飛我時  
坐小室如魚藏水湄半空亂荇藻檜柏紛傾欹竹瓦一  
聲裂荷珠千點隨凝視念方寂傾聽神已馳洞庭及彭  
蠡巨浸浩無涯長橋暗煙水萬艇浮鳬鷺湖光吸雲氣

天龍尾倒垂紛紛落銀槍隱隱來金支風濤信浩蕩舊  
夢成迷離真心思六合嗒然意若癡何當臥孤篷江上  
看虹霓

魯興三十生辰詩以頌之

其間羅浮見日島乃在飛雪嶺上層三更海潮忽變紫  
天雞叫出雙銅鉦千門萬戶酣曉夢有客來睹朱霞升  
朱霞亭亭湧日輪馳送有脚之陽春人生三十仕天闕  
譬如初日含陽精行空莫遺纖雲翳煦物要並祥飈迎  
傳霖召雨本家業子也繼起逢昌辰卽今文學列侍  
從行見經濟敷蒼生吾鄉近頗乏朝貴子門獨盛多簪



纓尚書退居羅浮下洞天福地開赤明誰言桑榆近晚  
景且看若木輝朝暘天門詆蕩銅龍鳴六螭五鳳朝太  
清珊瑚挂網向瑤島虹蜺秉節迴蓬瀛文章報國忠  
孝事所期於子惟令名笑余瞠後似夸父荷杖但逐麒麟  
行

讀晉書偶詠

王衍尙清談自許達名理絕口不言錢似勝阿戎鄙何  
期致三公尸位良足耻謬云無宦情坐令壤綱紀方思  
營窟生卒致排牆死牆實窟竟虛比悟亦晚矣吁嗟復  
吁嗟此輩皆名士

何曾爲宰相僭侈已習慣日食費萬錢子乃食二萬以  
此貽孫謀宜其罹誅譴嵩也太無知謬謂有先見佛慈  
不能齋鬼餒望誰薦生無下箸處死併無麥飯

陶公有經濟深慮宏遠圖惜陰運階甃戒荒毀擣蒲竹  
頭及木屑得用皆早儲近方葛亮駕遠過陸抗徒如何  
存褊衷擁兵坐踟躕藉非太真言臣節其虧乎事君矢  
無二爲國甘捐軀烈哉卞忠貞所以爲丈夫

吾愛溫忠武慷慨負奇節保障當西陲勤王赴北闕灑  
泣獨登舟大義自申說吁嗟討賊功斯人最爲烈英雄  
氣本豪兒女情亦黠鏡臺窺老奴風流笑奇譎

處士盜虎聲殷浩實可鄙屏居至十年屢徵且不起可  
哂王謝尚愚常以管葛擬出山負蒼生落慙慙名士  
一蹶不復振咄咄真怪矣我思庾江州此公真知已束  
之高閣中位置乃得耳

謝公隱東山本非遺世者出處關蒼生憂樂繫天下中  
年以後情絲竹自陶寫雖云近放達要自異游治大臣  
器寬舒名士意瀟灑琅邪王茂宏何足方大雅

華王內史書名掩經濟兩遺殷浩書熟料安危計可  
惜豎子庸身敗國亦敗公知不可爲自結林泉契懷抱  
託千秋翰跡空一世自將蘭亭竹譬彼淮南桂燕雀已

高齋鴻羽尚沉滯誓暮歸去來終焉遂初志

余以眴吟廢舉業魯輿常以此規余矢以得詩百  
篇後今歲當不復作忽忽秋深而債仍未了魯  
輿期以九月朔日爲余戒詩因念菊花開時不  
可無詩而戒限已促姑先借題抒詠詞意皆無  
倫次聊以足百篇之數云爾

刪緱一劒走風塵低首陰符術未神自笑名心太癡絕  
願將卿相換詩人

一年清課百篇詩未了須償莫負之籬畔有花傳葉語  
向儂賒取落英詞

香艸文章屬楚騷  
紉蘭搴芷太無聊  
何妨借汝思公子  
紫蠟黃橙慰寂寥

長椿寺裏花千本  
吟舄閒遊記舊年  
今日街頭看蓓蕾  
一叢初放雁來天

苦憶當年病婦容  
銀鐙背影怯西風  
蜚寒蝶瘦看如許

墓艸蕭蕭共一叢

余先聘蕭氏女年十三病瘵蕭僑寓浙江嘉善城內余家吳下來就醫匝

月歿後先君函其骨歸葬今十八年矣

不堪離別蹙雙蛾  
獨對秋花喚奈何  
縫向枕囊醒客夢

寒香較少淚痕多

別時惜人祇  
菊沅一具

京國緇塵掃不清  
風沙簌簌撲疎櫺  
才仙配食何人薦

一  
寒泉貯膽瓶

琴尊茗碗送秋光客裏情懷浣俗腸我便無花也滿觴

秋齋相對連東陽

謂晴

懺除綺語應相規從此耽書少作詩側耳秋蟲聲亦歇

四山落葉乍寒時

題杜辛山

隱居

孝廉珠江鼓棹圖

記得珠光里艤更伏枕中月華烏鵲樹潮信鯉魚風十

載夢魂隔相思煙水空誰携圖一幅翦浪駛孤篷

花月春江夜韻嫌畫不如中流急簫管大筆舞龍魚我

亦狂吟者司來弔楚諸回頭看鄉樹雲水迥愁予

松蘿菴拜楊忠愍公像

九天虎豹當關蹲，巫陽散髮招公魂。  
圓扉碧玉滲階石，  
畢表大鳥號祠門。祠門日落蒼煙昏。  
噓噓烏鵲不敢喧，  
孤臣遺恨在史冊。  
過客漚淚沾衣巾，  
彼賊除公患養虎。  
惟公絕筆如獲麟，  
中間年譜皆可按。  
乙卯之際同甲寅，  
爾時慘獄苦平反。  
當借公手旋乾坤，  
葫蘆釀成合歡酒。  
醉倒天下酣陽春，  
乾隆初有人于虎坊橋購一葫蘆上  
歌嘉靖己酉秋九聖謔自應司出納，  
辨樂豈止同伶倫。  
日取山二上五鈞天入夢何太幻，  
廟堂罕見金鐘陳。  
一轡肆惡足相困，  
九鵲翔舞知何因。  
有明養士意良厚，  
議禮大獄嗟煩冤。

雖然庭杖及遠謫要未斷脰戕其身自從賊膏肆搏噬  
遂蔽閭閻暨紛爭信忠良刈殺禍始此元氣斲喪斯無存  
驚沙捲地風拔木蒿柱轉眼成灰塵覆巢之難古不免  
空遺舊宅貞松筠吁嗟乎律呂廢缺金石湮生靈塗炭  
悲中原彼蒼亦欲置公死庸君奸相安定論

歲暮感懷

囊空屢歎酒無錢冷坐惟餘舊日氈書劄未容干宰相  
金銀亦足困神仙時魯輿亦以歲事窘迫相憐但有燈花好增悶  
翻嫌爆竹連一事夜深堪喜慰市聲閑熱是豐年

歲暮懷溫翰初肇江



一燈賓館意闌珊  
梁月何因照別顏  
雪後思傳千里雁

夢中同看六朝山  
頗聞孤棹衝寒出  
或侍高堂趁臈還

我欲訪君仍入畫  
萬梅花擁一柴關

翰初常畫定香亭  
詩意記得夢中相

訪路萬梅花擁  
一柴門見寄

### 寒鐘

隱隱潮音度落伽  
魚龍拜罷月輪斜  
燭來城市醒塵夢  
何處波濤泊斷槎  
龕裏寒僧煨芋火  
峯頭山鬼護蓮花  
吳船有客眠難穩  
消受清霜感鬢華

### 寒柝

爐火將殘漏點稀  
重衾如水客眠遲  
遙街夜靜月光凍

虛壁風寒燈影危  
村犬有聲嚴設邏  
鰥魚無寐久忘疲  
九門幾個搖鈴卒  
破帽籠頭雪滿髭

寒硯

劒壁孤光閃閃移  
寒宵有客掩重帷  
得來書味濃於酒  
夢入閨情暗若絲  
寂滅聲聞形影悟  
光明心事鬼神知  
元精自有千秋照  
不借青藜太乙吹

寒硯

龍尾沉沉蟄九淵  
敲冰空裂研光牋  
三冬古水凝金井  
五夜枯桑泣石田  
紙閣每教烘宿火  
筆牀原許割寒氈  
玉堂春信爭遲早  
相伴蕭齋已廿年

冬夜獨坐懷盛子履

大士

標靜月無語檐虛風有稜思君如古佛枯坐對寒燈老  
眼飽叢帙冬心涵瘦冰蕭條賓館意我亦淡於僧

禁城雪夜

三更冷欲透疎櫺天際鵝毛攪不停戶外光寒儻滅燭  
街頭聲緊卒搖鈴撒鹽空擬糝青子沽酒應須對白丁  
不道禁城如此靜老松殘竹響虛亭

殘臘雪霽後寒甚適子履以江亭消夏圖冊屬題  
用東坡聚星堂雪韻

亂鴉攢樹如聚葉女牆倒壓西山雪翻令寒上憶炎熇

忽漫披圖詫清絕空亭盡敞柳未荒積潦半乾蘆欲折  
火雲烈日同灼蒸水影山光互明滅座中詩虎傾千觴  
天際墨龍待一掣當軒翠欲撲眉宇開徑紅爭醉眼纈  
此圖渲染本天成弄赭調鉛初不屑鳴蟬咽樹纔幾時  
流駒逐影去如瞥毛羽脫盡苦寒號慢膚多汗誰敢說  
何當扇笠續此遊差勝被稜冷似鐵

### 愁來

愁來痛飲讀離騷三十無成首屢搔數頃荒田將出骨  
吾鄉佃戶有田皮田骨之語頻年名紙欲生毛家因有累才疑小人  
若無求品可高識字畊田慙兩負好携鑱柄束霜毫

除夕思親作

征衣線憶手縫時三載辭家斗柄移  
空使高堂勞遠夢誰憐遊子悞歸期  
鄉書認押平安印春帖先攤吉利詞  
看到歲朝圖畫好白頭扶杖共嬰嬉

讀白華草堂詩初集卷四

戊寅

鎮平 黃釗 穀生

元旦試筆

鋪就鸞牋研麝煤新年吉語自心裁  
榜花次第秋開遍  
慈竹平安日報來  
願有異書供眼福  
兼求奇境闢詩才  
團圓家慶無須祝  
遙指紅雲認嶺梅

新正之獲鹿途中却寄都門諸同好

匹馬滹沱渡冰霜耐別顏  
煙中薊門樹雪後井陘關  
舊侶幾人念新鴻一帶還  
征衫重檢看剩有酒痕斑

郭隗故里

黃白之物奚重輕投之以骨羣狗爭可憐燕昭雪國恥  
築臺亦以黃金名當時此策自隗始置酒華陽召名士  
老臣願效毛先生愛士何如趙公子插標懸價天馬徠  
功成於我何有哉高臺一旦生荆棘故里千年亦草萊  
蓬轉

馬狗衣鶉去住違卅年蓬轉此栖遲瀉泥舊跡看詩本  
楊柳春光感鬢絲見事每當殘局後懷人多在獨醒時  
篋中燕將傳新錄惆悵樽前杜牧之

定州道中

夢遶車輪轉道周心隨流水日東流燕歌趙瑟空憐甌

明月清風不解愁淺赭初皴原上柳淡紅微辨驛邊樓  
八年前醉中山酒又遶孤城過定州

正定寫望

恒岳西來扼太原滹沱東下避桑乾馬嘶古磧黃雲動  
鷹下高城白日寒地控幽并趨俠客時平耕種老材官  
神州拱衛稱雄鎮莫作尋常沃野看

過滹沱

冰泮蹙飛湍頽沙帶日圍河流萬馬遏風力一鵬盤當  
日真王起倉皇欲渡難誰知大澤畔煙水有漁竿

幕中吟



昔白香山作秦中吟指陳時事意在懲勸不嫌  
直遂余從獲鹿令涂容齋幕中稔近日畿輔州  
縣積弊因就所聞作此

免征苦

北地常亢旱黎滿村哭 皇仁特免征歡聲動茅屋  
詎知州縣官聞詔轉眉蹙免征定免役錢糧苦不足上  
官供給繁幕友薪水促何處贏羨餘妻孥看食粥我欲  
乞天公兼爲官民祝五風十雨調四時轉玉燭境無八  
口饑歲有四秋熟爾民樂輸將官亦飽食肉

上控案

清官豈不佳乃有上控案問其所以然胥吏實爲難峭  
壁難立厓急水難立岸若輩飽腥羶焉能共食淡積久  
成蠹奸排比若魚貫遂有無賴民爲彼金所啗架詞冀  
動搖列歛請推勘阿誰似溫嶠燃犀燭幽暗貪官伸手  
爲好官轉眼換至清水無魚斯言豈河漢

### 派差役

某村派車輛某堡出馬匹某甲具供張某乙充夫役里  
胥送票來官但過硃筆誰知一道符其弊乃百出蠹役  
串劣衿得錢共乾沒差來派鄰村剝削加措克更有中  
戶民挂名人卯冊藉以避征徭數不下千百力役旣不

均科派復孔亟因之多上控卷案如山積我聞老吏言  
情形實洞悉固非民之抗亦非官之刻如何庶有豸毋  
令若輩強

鷓鴣

畏寒猶自擁朝暾生愛南飛識性溫何用能言學鸚鵡  
哥哥兩字已消魂

春暮感懷

三十又過二客中當暮春誰能慙杯酒相與酌花神白  
髮試嘗我青山來瞰人捲簾看燕子去住汝何因

春興

春柳儘貪眠春雲自靜娟花身香裏損鳥夢午時圓硯  
窄難容水琴寬未上絃睡回尋好句石鼎試新泉

井陘口弔淮陰侯

拔趙幟立漢幟當時侯有絕人智求假王許真王侯智  
侯胡不及防吁嗟乎軍中相背朝中躡足侯用智侯卒  
戮土門關鬼雄哭寄語鬼雄且勿哭廟中享汝野雞肉  
過本願寺

石邑倚崇岡犖确但瓦礫傳聞釋迦像因訪招提跡入  
門見古塔壞若死灰色荒涼賸碑趺約畧辨階級泥佛  
面落黃饑鵑眼瞪碧掃葉來病僧曬禪臥寒乞鄰雞上

臺基攪土出猛蠍  
叛建想開元紺宇  
崇輦革陵谷屢變  
遷盛衰慨今昔日  
暮更蒼茫欲坐不  
敢息酸風出頽檐  
嗚嗚作鬼泣

竹詩四首

十萬當年許買鄰  
清流合稱此君身  
笑聲大似風狂士  
醉態欹於酩酊人  
應有煙雲畱粉壁  
幾曾斤斧代樵薪  
蓬萊且待青鸞集  
未許皮冠托隱淪

故人掃徑接羊求  
把臂林間續舊遊  
作筭何曾慙負腹  
寄檐那肯便低頭  
由來太守能推抱  
况遇中郎善解愁  
千萬个中看直節  
不應倒影逐波流

高低疎密儼成行汲水擔泥事太忙稚子看抽頭上筍  
女兒催整嫁時箱也知弱幹還緣嶺其奈橫枝待出牆  
料理千金分種好買山此後再商量

相思無那盼檀欒徙倚重吟翠袖寒遠道淇泉分左右  
經年蕭寺訊平安剛憐出土篁猶嫩且喜經秋籜未乾  
好趁晴窗捶雪紙管夫人寫兩三竿

高臥

斗室容高臥當檐蔭古椿榻從山借綠夢與雨分春筆  
墨聊從賤圖書畧掩貧莫疑狂態減面目尙畱真

檢古琴江先生

光廷

遺集感賦

公我先輩行兼有中表誼繼爲忘年交性命託文字已  
已我遠行送我遽酸鼻離歌慘不懽別酒強成醉公仍  
守鄉國我已歷幽冀三年萬里中相憶勞夢寐我翁平  
生行慷慨尙風義揮金散鄉鄰讓產恤昆季辛未遭危  
疾不孝未及侍抱恨切終天得公爲文祭傷已見言詞  
質可代碑誌親情固云厚誄文況足貴壬申我歸來麻  
衣漬血淚其時正毒暑赤日灼平地公聞我遠歸亟欲  
來唁慰倉卒中痰厥氣結兩目閉醫藥旣罔効嗚呼竟  
不諱居喪者不弔禮敢爲公泥蓋棺及一見愴絕心俱  
碎遺文代收拾一篇得之笥精魄庶不散寶光豈終闕

縱難定必傳豈忍令拋棄延陵挂劒心俞子抱琴思攜

來行篋中敢與託孤異我伯

錦亭先生

官廣文與公爲同輩

二老擅風流精神早投契我兄

伍雲

古狂狷險語鬼神悸

公嘗誦其詩愛之等痴嗜集中互唱酬鼎足分開位摩

壘擊三面拔戟當一隊小子蝨其間灞上等兒戲騷壇

五年中相繼各俎逝我今過三十微名尙沉滯親戚已

遠違父兄久見背反覆讀公集百感沸腸胃死者長已

矣生者若何繼千秋身後名期以問當世九原倘有知

松柏吾其誓

清明日追感益齋兄二十六韻



飄泊愁征雁淒涼拜杜鵑怕看池畔艸隔斷墓門煙腹  
痛餘今日心酸憶往年垂髫同弟學上塾得兄憐慘綠  
衣親整膳紅墨代研晨呼釀面水晝給點心錢盛暑教  
寬坐嚴冬令早眠獎勤兼激勸撻過亦矜全遂使終童  
志思搖祖述鞭梅花循嶺路竹箭駛江船燕羽由來弱  
鴻毛未遇便先人餘白屋誠我守青瑣期望情何切殷  
勤眼幾穿上竿催進取刻楮督精專詎料成人日偏慳  
一見緣遺言尙嗚咽劇病已延綿慟絕肝腸碎淒其涕  
泗漣孤兒三人藐寡嫂百憂煎從此傷門戶何堪問舍  
田鴿原悲已矣馬嶺况蕭然昨得書傳到爲云墓已遷

相鄰先塚側還近故山巔  
麥飯荒寒節梨花黯淡天  
無由奠魂魄空復滯幽燕  
惘惘過三十迢迢阻八千  
何時能載筆表誌立新阡

讀家虛舟先生鴻雪齋詩集用東坡聚星堂雪韻

題寄家太史在菴

玉衡

西江詩祖傳累葉誰其繼者今  
鴻雪寒來子敬惟一瓊  
老去鄭虔擅三絕生平可傳不但詩  
卽以詩論尤心折  
千尋峭壁骨自蒼萬樹梅花香不滅  
霜筠玉戛紫鳳吟  
雪瀑珠翻白龍掣沖懷雅似遠水平  
冷艷還如瘦冰纈  
以之壽世信可珍若論昌身初不屑  
我慙老杜稱驂騑

終讓家駒隨電瞥詩人有後昌吾宗風雅提倡猶能說  
嗣家報國皆文章海上珊瑚網挂鐵

子履以詩見懷奉和原韻一首

哀絲豪竹助悲歌同調相憐得幾何白雪郢中才子少  
碧雲天際美人多風騷有嗣傳高響聚散無端感逝波  
適得君詩倍惆悵素心千里指纖阿

白丁香絕句

粉苞半坼正齊檐惱亂清歌昔昔鹽彷彿風廊初見日  
澹粧斜倚墨花簾

名君洞

近山聞泉聲驟覺涼氣重曲折緣虛亭盤旋落陰洞齋  
厨煙火冷石壁苔蘚凍微雨從西來遞作笙竽送老鶴  
喚不應碧雲鎖深夢

自題煙波過客畫冊用吳淪齋

其濬

修撰題後詩

韻

十年醉墨滿津亭颿鼓催行去不停縮取長江歸粉本  
硯屏常潑六朝青

黃鴉穀穀柳蓼蓼春困連朝睡正酣夢到維舟舊遊地  
販茶挑筍話江南

獲鹿幕中作

滿目黃沙障春風到未曾  
野花韓信寨衰草趙王陵  
戰地思盤馬晴天欲下鷹  
愁來便彈鋏笑問客何能  
覩土方移竹書牆更種花  
未須嫌北地聊復謝東家  
露重紅堪摘窗虛綠待遮  
鄉園有嘉樹相對渺天涯

三月十五日卽事

黃沙蔽白日土囊刮乾風  
夜來占箕宿哆口光熊熊  
此間久不雨自秋已徂冬  
入春雨番雪土脈尙未融  
譬如肺焦久津潤難爲功  
災黎坐枯槁守土憂蘊隆  
齋壇事祈請哀籲呼天公  
百呼尙一應不應天豈聾  
北方地高燥磴确山皆童  
艸木尙不生雲雨何由濛  
蹄涔一勺水

乃欲興蛟龍非龍不行雨雲薄變化窮坐思天南方  
蓑笠披村農山田夜泉決濕霧朝煙濃尚恐春漲來隄防  
當其衝四年別鄉國塵土面目蒙關心在桑梓側身隨  
梗蓬此邦非吾土地異民則同詎能無休戚亦代謀豐  
凶刑獄官自恤疏奏吾能工爲文檄社鬼請命求饘  
庶幾澤下尺權聲齊奔洪

讀余忠宣公集

科第畧亞文天祥志節復見張睢陽河岳精靈日星  
直以浩氣畱文章我昔南行浮皖江維舟恰傍清水塘  
掘衣入廟謁公像愧無一片婆律香心香復向遺集拜

鬚眉蕭爽神軒昂籌兵借餉值支詘上書地剗何倉黃  
七哀一篇事戎行語雖溫厚心則傷帝世蘘龍亦何有  
中原豺虎爭披猖上擬元公詠破斧不共屈子歌浮湘  
沈雄博奧具各體可繼雅頌自憂書視危太僕直牛鬼  
豈楊徵士能頡頏嗚呼有元取士如俳倡幾人隻手迴  
瀾狂惟公大節扶綱常吐爲文辭發光芒太阿氣貫牛  
斗傍陰風颯颯動窗紙尙恐六丁雷電來取將

魯輿典試蜀中過獲鹿境於傳舍抵足作竟夕談  
黎明別去至徐溝寄詩見懷郵和四首

憶我始識君君顏皎如玉高情薄雲天清標峙鸞鶴乍

見卽投契久交彌敦篤一室儼弟昆兩載共食宿維時  
皆少年意氣差不俗匪恃車笠盟所望雲龍逐日暮藤  
花陰書聲出深竹

恩恩近十年雲泥忽已隔君爲視草人我作飄蓬客昨  
日羽書來皇華戒徒役聞君乘星輶校士秉玉尺日夕  
望君來君來我心懌燒燭且傾杯離緒慰一昔倦僕紛  
觸屏殘燈尙挂壁郵亭抵足眠何殊風雨夕

天雞喔喔鳴使輶催遄發王程不可畱我懷未能豁  
握手復贈言真賞在鑒拔益州山水奇神秀鍾邦傑長  
卿典冊文子瞻日星節典試往是邦棄取慎毋忽去捫



井絡星歸看我肩雪哦詩儻我寄藉以慰鬱結  
昨宵聽雨聲孤眠忽不懌修途想泥濘恐君行不得書  
來慰相思知抵同戈驛上言別無恙下言去相憶中間  
勉我語肫摯復切直謂我有老母科名須努力東海盼  
修鱗南溟仰矯翼懷哉素心人浮雲翳西北

松林店道中

一雨洗山骨天高嵐氣沈寒雲入歸雁古寺出疎林馬  
耳風初冷牛腰水尙深稻粱安穩食羨爾集田禽

方順橋

解衣倉卒爲全軀小智生平尙不疎同是奇謀興漢室

有人圯上說傳書

琉璃河鐵篙行弔王彥章

金色蝦蟆爭努眼翻却曹州天下反碭山小民亦作賊  
豈料諸兒直豚犬鞬繩拚死來敬翔此時只有王鐵槍  
謗書已入招討出以笏畫地當朝堂生平頗輕李亞次  
鬥雞小兒何足畏兗州不守守中都空有保鑾五百騎  
跣足履棘走若飛汝名善將亦失機驍勇足抵周陽五  
死鬥乃逢夏魯奇大事已去臣力竭豹死畱皮忍苟活  
斷頭不仕唐朱邪開眼笑呼邈佶烈何年刺船持鐵篙  
紛紛流俗爭傳譌六州鐵鑄何人錯落日空迴壯士戈

示衣坂中顏忠節公

兩角女子綠衣裳走上太行邀君王宮中已棄洗兒保  
賊騎猝至皆倉皇迎賊歸來曳金紫誰其從者袁長史  
沐猴續貂吁可傷與君何爲乃着此九重不識顏真卿  
詎復知有真卿兄連兵討賊一呼應十七郡已歸朝廷  
天意未欲臣滅賊可恨漁陽事不密太原望斷援兵來  
先有賀蘭甘誤國堂堂秘監五世孫忍從羯狗爲賊臣  
橋柱共縛鉤舌死睢陽同盡悲忠魂碧血已銷年代遠  
路人尙指示衣坂紛紛僞職受緋衣斧鉞千秋泣華表

題徐秋士

元潤

小廬峯館詩集

絕艷才華絕代情風流江左舊知名六朝人物推常侍  
一代宗風繼罔卿楊柳春波鄰舫笛芙蓉秋夢隔樓笙  
珊瑚筆架君家物斐几排來眼倍明

梁蓼圃

吳奉

祖諱南歸迂道來別時余以京兆

榜發被放益愴然於懷因成五十韻敘別

任無懽樂懷去有慘悽色吁嗟我與君又作黯然別伊

昔課成均講舍始接席見面卽相器論心暫莫逆維時

兩寒生相倚若蛩蛩同車似雞棲共命仍蠖屈君時館

有徒我亦龕有佛

時余寓居僧寺

短檠風雨來高歌鬼神入延

譽勞公卿參幕同薦辟

同受直隸學使吳少宰之聘

策馬桑乾流驅

車太行雪詩挾幽并氣酒人冰霜骨鄉語間誹諸客况  
 忘偏仄壯遊賸長鋏大敵餘健筆顧盼各自豪轉眼忽  
 相失凶耗南中來我父成永訣萬里阻如何五內痛  
 崩絕君時送我歸攀條泣然折自云昃少孤祖父撫成  
 立微祿倘逮養私望可無缺我歸居聖廬君畱依京國  
 哀哀返林鳥旋旋逆風鷄爾時意迷惘欲語心抑塞一  
 別倏五年相見喜欲泣平安二老在艱難一科掇得此  
 亦少慰將飛復暫息君爲過夏人我亦傷春客看花眼  
 拔刺談執口叟棘鄉訊遲征鴻風光警啼鵲當時畏飯  
 友復此數晨我文木無範君來覺有益三年楮刻玉

一寸硯穿鐵誰知逞博技轉恨踈劍術失意出國門落  
魄爲記室昨往過尹寓談論唱令背鴉鴉啼何悲鵲鵲  
噪偏念君占疑有凶我卜詎得吉卜者非朱衣占者竟  
羅經聞君星弁歸累我日望切日午蒼頭來出君數行  
札因思面別我迂道至石邑握手已淒然百端况交集  
我慚面黧垢君復形毀瘠朔風捲黃沙浮雲慘白日仰  
天見歸雁孤飛影將匿往事不可論此別更堪惻讀書  
負十年買田少一笏微名皆貽悞隱憾各難釋君行自  
徒跣我任亦乞食我母君祖母盼望知孔亟言之摧心  
肝豈但沾胸臆

博浪椎

博浪椎椎不中祖龍作肉臨博浪椎魏朱亥博浪椎椎  
不中祖龍亦破膽博浪椎似石敢大索天下不可得頗  
疑力士乃劍客祖龍氣沮空奈何博浪椎勝荆軻

銅雀瓦

銅雀瓦啼紅鬼怨歌舞泣香履美人黃土奸雄白骨千  
秋萬歲鮮花自碧漢家銅仙淚亦瀉長毋相忘一片瓦  
守誤兄書來述近倩雲谷山人作據梧聽讀圖命  
余作詩余未見圖也寄題一首

我慚識字耕田夫長安久住同羈孤昨宵有夢返鄉國

柴門積水浮鷺鳬玉墓潭

宅邊潭名

上橫釣畧水清可數無

寸魚繞潭而上不半里夢中識是吾兄廬吾兄三人兩

同居迄今存者惟兄謨阿恢阿喜兩兄弟吾兩兄子皆

讀書吾兩兄子讀書好課諸弟讀如課徒三間白屋枕

溪水一片綠陰圍碧梧夢中隱約聲呶呶之聲滿

庭除阿恢伏案究經古阿喜頗似勤經畚餘者幼姪分

四隅唱予和汝壘篴如吾夢見之歡且娛夢醒而後能

憶無夢醒亦恐不盡憶擬記以記圖爲圖今晨忽接平

安字吾兄所書遠寄吾且云近倩雲谷畫畫與吾夢無

差殊風景歷歷宛在目此書讀罷翻嗟吁年來作客在



京邑諸姪講藝亦已疎豈惟諸姪講藝疎兒且廢讀亦  
有諸風塵久困牛馬走馴養空憶鸞皇雛伊格有枝棲  
鳳雛森百尺高濃蔭鋪何時席地據梧坐與兄聽讀傾  
千壺

日行疾

馬行遲日行疾逐電難追日輪及馬行疾日行遲停轡  
適當日午時蠅蚶不知春秋朝菌不知晦朔人生百年  
醉飽懽樂鏗鯨鐘擊鼉鼓座上客孰爲龍孰爲虎孰爲  
狗孰爲鼠上天入地億萬年日出暘谷入虞淵

高氏女

高氏女命不辰少孤依兄嫂兄歿與嫂撫孤望孤成人

解兒五歲嫂病篤執女手嗚咽囑高氏一塊肉上無伯

下無叔今以委小姑小姑看父母看兄嫂看孤兒代撫

育嫂死去亦瞑目女聽未畢嗚嗚哭解二嫂既死痛欲絕

一老嫗伴孤子製綿衣骨肉糜視孤姪如孤兒解三女年

及笄無姻姪族人利產諷之嫁女智深沈但笑謝白後

撫姪益防護餅餌茶湯必親作解四姪漸長就書塾僕負

而出嫗負而入女時涕泣孤姪前兒乃高氏一塊肉姑

看父母看兄嫂看兒成人兒慎莫爲不賢使吾父母兄

嫂不得瞑目九泉姪憤讀乃補弟子員距女及笄垂廿

年五解姬時昧女意勸作終身計女謂姥孤吾撫彼何惜

此一杯土數十年如一日年八十餘無病卒六解高氏祖

籍清平山東望族今有聲女名妙青生於明嘉靖年行

有徵若父若母闕其名前朝之事誰爲旌七解嶧陽有桐

百尺孤垂乳滴滴巢鸛雛不爲慈母爲義姑八解

憶白門兼寄溫翰初筆江馬芷生沅

瓜步濤聲夢未降三年前記買吳艤春如鷗鳥爭浮水

人與楊花讓過江迴首吟情空杜若祇今愁思託蘭茝

美人隔歲無消息盼斷潮頭尺鯉雙

奉答何子真弟見懷一百韻

紈袴不餓死儒冠多誤身少陵作此語賤子請復陳僕  
木放浪子束縛在籠樊總角入書塾負志頗不羣立言  
思孔孟講學厭洛閩虛聲笑處士實效期天民狂談駭  
老儒小技炫衆賓學作大人賦輒冠童子軍爾時氣豪  
邁顧盼同蘭筋一日可千里誰能逐囊韉紀年值在卯  
釣鼃東海潒沈沈珊瑚網開仙人搜紫珍碧犀海童獻紅  
珠靈蛇娠元貝銜光怪赤五隱璘斌沙沙有寶鐵亦取  
貢九閭刮摩共拂拭豈曰非師恩騎驢別鄉國看花  
來帝闥狂風及妬雨冷淡當蕭晨道傍短後衣時笑  
方山巾功名鄙程李辯說輪儀秦再來錢不值但去舌

尚存舊游二三子一一登華津蘭臺簪赤管華隰乘朱  
幡流沙昂天馬阿閣巢祥鵲繫余似跋鱉蹠困風塵  
出門馬似狗閉戶衣結鶉公卿縱青眼虛譽不採貧西  
走太行山詰曲摧車輪落魄爲記室乞食同王孫劉尹  
幸知我鄧禹且笑人有時或被酒肝膽空輪囷男兒抱  
七尺浩氣彌乾坤方寸壘五嶽眼界窮八垠醉來手一  
厄驅馬望古原假王非人傑蠻長祇外藩野花開空寨  
衰艸連孤墳獲鹿有韓信寨及趙佗祖陵黃雲塞上來四野風沙昏  
感時多慷慨撫景還酸辛天南在何許鴻雁久不聞高  
堂有老母鬢髮垂似銀菽水且不給梁肉空復論健婦

手操白嬌兒肩負薪冒暑膚汗落遇寒皮肉皸無術贍  
妻子况欲周弟昆大言尙不慚謬謂能致君豈真平生  
志不在飽與溫賓戲恐不免解嘲復何云何耶奚所見  
反覆語諄諄尺書未讀竟蓄淚已暗看知君作苦語亦  
非無病呻才名似羅隱下第同劉蕡及鋒方待試按劍  
仍遭瞋更聞悲落葉歎逝同黃門有膠難續斷無香爲  
返魂文人有磨折早運偶遭連痛哭學賈誼幽怨疑靈  
均楚南舊長沙厥江曰湘沅自古盛騷客香草遺蘭蓀  
君詩得宗旨悱惻兼情文山鬼泣斑竹美人睇綠雲軒  
騰大波瀾媚折小波渝九疑望飄渺七澤鬱芬島此才

詎可量役使龍蛇奔況復工時藝蠹簡生靈芬宗經樹  
風骨說理探天根持此作羔雁豈復遜璠玕胡爲亦被  
擯玉石幾同湮嗟余共遭刖抱璞久未伸荒莊負陸贄  
壯志虛劉琨與誰訴抑鬱惟汝共淵源我師本寒士奮  
起如鵬騫探花向蓬島視艸趨楓宸名因文章顯位以  
道德尊平生忠孝懷見於兄弟倫連床裁大被瀟酒傾  
瓦盆團圓共笑樂至性老彌敦頗聞未達時亦復艱饔  
殮大賢有學問窮困無尤怨君年未二十文采同輩鵠  
駿蹄知暫蹶龍性非難馴自當紹家學肆而求益醇磨  
礪去圭角韜斂涵精神卑以諧俗眼約以綜羣言勿如

太阿劍鋒芒不可捫勿如崑崙水浩瀚不可分斂才姑  
就範庶幾匠石掄予才誠不逮鑿言或可詢亦非有憤  
激固自傷滯屯讀書三十年不如買犢耘饑寒走萬里  
行役徒莘莘謾誇牛有角貽笑猴無臀十上說不行一  
蹶幾難振大言媿宋玉逸足慙士元傷今與弔古徒令  
中心煩修名已不立學道況未純無以質師友遑論報  
君親君詩怵肝腎使我腸胃翻中宵擁衾坐寒月臨松  
軒四山木葉脫萬籟不復喧千秋萬古愁書以報子真

唐李寶臣紀功載政碑

碑在正定府察院

石高丈三闊六尺大書深刻蟠踳踞永泰二年七月建



成德節度之穹碑其文漫滅尙可識捫讀不異摩癢胝  
叛臣反常擾東鄙人用慘黷幾無依惟公牧恒天眷爾  
水旱盜賊咸扶持鋪敦四凶虜待翦翼戴三主帝所資  
紀功載政孰爲此當時幾謂無媿詞吁嗟朝綱不再振  
中興碑自携浯溪蟠根仙李屢賜姓此術母乃空縻羈  
盧龍尾賊頗嚮義遺縑一怒臣節移將田爲侶惑石識  
小兒愚弄誠堪嗤山東雖連李正己河朔尙親郭子儀  
臧紇以防未敢叛李催襲汜仍相疑強藩跋扈恣驕橫  
功名何者堪昭垂韓文柳雅不可得刊碑我憶平淮西

效阮亭詠史小樂府

讀元史

慕義來諸郡銀成沒奈何

蒙古二字國言銀也

九旂初尙白稱帝

幹難河

奉使持龍節傳書託雁臣曾聞蘇屬國今見郝行人  
增賦行鈔法中原已驛騷當時董文用不肯翦羊毛  
聚斂增鉤考江南盜已多宏羊烹不盡別種有桑哥  
可笑贛州民揭竿卽授首上年劉六十今年蔡五九  
老識兼深慮寧輸道復功潛龍當勿用不可累儲宮  
隱士遺笳曲司徒進識文何須信符瑞終是甲辰君  
詔改宣文閣延師奉楷模丹青無不有獨進比干圖  
災異尋常見無人勸省躬壺蘆堪大笑皤腹棗陽童

縱罷河防策仍愁九鼎淪石人一隻眼眼見起紅巾  
常云睢陽齒可配常山舌咄咄李知府兩膝竟如鐵  
秘密大喜樂供養取美女白蓮任燒香且看天魔舞

讀哥舒翰傳

開府威名重朔方枕戈猶惜棄河湟可憐肉眼低頭拜  
孤負梨花半段槍

班禪額爾德尼與達賴喇嘛皆間年人 貢嘉慶

二十三年十一月十八日班禪遣使堪布羅布  
藏索巴等至京過獲鹿劍出東關觀焉作詩恭

紀

皇威震讐來遠夷合康衛藏連三危粵有班禪長西陲  
越四萬里經險巇歲與達賴朝京師厥貢曰包非秬  
秠彼國所產多獐狝貢其上物隨土宜其長曰額爾德  
尼上尖下大帽式奇帽色尙黃弗尙緇內衣半臂蔽體  
肌外衣偏單帛交施概以璫璫羊毳爲或著錦韉或履  
皮喇嘛服飾則效之戴紉磬巴分等差松綠璫璫兩耳  
垂厥帽平頂短纓綾絨緞狐沿所不羈獺皮覆頸毛髮  
鬻手持念珠語盟呬噶布倫亦同蕃廐驪駟黃騂騅  
駟從馬百匹疾不遲貢車百兩裝重輜亦有餘包別以  
私與中國市獲原貲我聞彼俗畧可稽刑法慘酷嗟爛

糜蠍螫猶食分行屍油沸及裂加以錐淫凶殘悍誰得  
治獨於喇嘛告飯依我朝定鼎宏丕基班禪占測先  
來歸熬茶遣使瞻丹墀純皇聖武式九圍與其慕  
義誠若斯錫之金冊輝虹楣祥輪寶地奎章披猗嗟  
聖德追黃義獻雉貢象爭航梯豈羨烏弋誇黃支區區  
漢唐陋可嗤迎佛拜佛求降釐何如我皇文德綏活  
佛匍匐瞻天威

野望

蒼然平楚外眺望眼增明古墓容孤穴荒塍借馬耕田  
廬占歲稔林木出冬晴偶動鄉園思前峯月又生

夜坐

徹夜默鈴替戾岡寒鐙如豆漏增長分明聽得霜鴻語  
凍月沉烟下晉陽

客懷

木落煙霏雁叫霜角聲如話助悲涼十年孤劍人來去  
五夜寒雞夢短長破悶工夫詩拉雜思家情味月昏黃  
依人乞食渾無賴稍改年時故態狂

題王荊公集後

讀書豈料誤蒼生投老林泉悔漸萌解悟鍾山基隱語  
如何客氣總難平

讀白華堂記  
冬夜卽景

冷氣逼銀井天光閃一庭怪禽磔枯樹野犬吠寒星境  
寂詩難索宵長夢易醒霜風鳴四壁蕭瑟共誰聽

題焚椒錄後

孤穩壓帕女古韓菩薩喚作耕幹麼可敦亦以色伎擅  
坐使六宮憎黑髮至尊愛幸夙無比共識女中有才子  
已看鸞卵哺乃山豈料龍髯傾袖水銀鈎呈出十香詞  
黑獄沈冤待訴誰乙辛毒計寧容辨戊子天書似早知  
椒殿沉沉閉魚鑰青苔白厚翠茵薄宮中誰見赤鳳來  
惟有階前朱頂鶴飛霜庶女絕可憐彩月東升卅六年

香魂空繞黃牀夢粉脰俄悲白練懸桃花牋紙紅絲硯  
貴家何苦以才見未改金輪如意年祇傳玉軫回心院  
中宮慘變自昔無賴有蒙哥雪此誣彎弧我欲射天狗  
涕泣當時諫獵書

習雲林遺事後

淨名居士生佛界不隱於禪隱於畫霜縑未許俗人乞  
秘閣僅容外夷拜我從逸事溯流風想見天懷最超邁  
清泉香茗主客圖古鼎尊彝弟兄輩高標識鑒軼驪黃  
低視雷流同癰疥傲世迴殊阮籍狂好潔稍同伯夷隘  
當時蹤跡極迂癖千載神往覺清快前有元章後子畏



並能脫畧破拘械終嫌二子太頽放似與居士非一派  
居士事母以孝稱北堂有萱樹之背管中果羸慟師恩  
沙上鵲鵲感友愛千金鬻產盡解推五湖放舟隨向背  
至今遺墨落人間不共璠璣向街賣由來至性無與儔  
豈但高蹤不可逮辦香且用東坡語廟食應從水仙配

夢至羅浮古梅花村作

夢到羅浮嶺仙村果不同梅花三百樹一半暖雲烘鬼  
雨灑紺蝶人煙橫碧虹桃源休悞認山下有樵翁

黃昏

纔上書鐙未掩門閒庭夜色逼黃昏老梅一樹已如睡

纖月半鉤疑有魂，催客年光驚鴈鼓。  
消寒情味託空樽，市聲吹得羣兒笑。  
振觸愁懷憶故園。

寒瓊

虛白射空幌，遠山明凍煙。  
冰封魚腹信，雪定鳥窠禪。  
讀畫更呵手，哦詩還聳肩。  
頻年瑟縮態，共命託寒瓊。

歲暮懷都門諸同人詩

孝章兩鬢已星星，老向王孫授一經。  
曾向宣南圖舊侶，背琴肩酒上江亭。  
盛子履廣文

仙吏初傳服豸冠，胎禽風骨最高寒。  
不知屋外西山雪，

可抵梅花畫本看。

家在菴編修時記名御史

索米長安客尙愁如他金屋儘綢繆頗聞閒日紅窗底

戲誦風詩愛好仇仇典堂孝廉

上詩何必定求名不飲還能見性情惆悵燕臺吟老將

一杯熱酒話平生麗子芳孝廉

絕世聰明貫九流著書嘔血祇牢愁養生論與延年術

應道相如渴病瘳張儀坡屯部

稻蟹菱魚爲甚酥同年常擾大官厨誰知貧宦原寒士

客散空飢乏米珠蔡樹百署正

投轄畱賓飲興濃耽耽百榼與千鍾平生自負狂鯨吸

無奈當筵遇酒龍李燕軒選部

雪屋寒光透朔風冬官滋味似冬烘謖臺未築通難避

日造車船送五窮

古海初虞部

午直歸來擁一羶悽涼寶瑟已無絃憑誰過訪維摩室

與說天花不了緣

葉鹿坡農部

參苓滿籠峽船歸可有漁洋蜀道詩料得青衣江上過

一天寒翠斂峨眉

顏魯輿編修

琅琊兄弟盡翩翩阿大聰明早悟玄愛煞紅鷺曇曇碾榻

銀鉤團扇寫游仙

王魯之小雲昆季

風神如向玉山行合住蓬萊最上清記否花牋雙管下

一篇瑤瑟答瓊笙

吳淪齋修撰

冰衙暫借白雲司檢罷爰書更檢詩同是歐陽門下士

同出姚秋農師門都官端不媿覃思蔡槐卿比部

送竈同吟隔歲詩他鄉情味醵殘時燈花已負刀鐙約

添得閨人鏡聽詞顏荅陵孝廉

白雪陽春郢客歌綠雲深處泣湘娥芙蓉冷落梅花瘦

紙帳生寒別怨多何子真上舍

頻年烏帽困黃塵獨與君家伯仲親莫怪諸郎同弟畜

師門我是受恩身花思白次江金三昆季

讀白華草堂詩初集卷四終